



El è da nov il schef da sport dal HCD: Raeto Raffainer.

FOTOS G. N. STGIER

«Jau n'empermet nagin titel»

Landquart: Preschentaziun dal team 2019/20 dal HCD

DA GION NUTEGN STGIER / ANR

■ L'emprima equipa dal Club da hockey Tavau saja ussa danovamain ina unitad. La finamira saja da cuntanscher en il nov campinadi la runda dals playoffs. Il team saja pront per procurar per schlantsch sin il glatsch.

La raschun che la direcziun dal HCD, cun ses directur Marc Gianola, ha preschentà il team 2019/20 a Landquart è che la ÖKK, la cassa da malsauens, è da nov sponsor principal dal club da hockey grischun. La ÖKK ed il HCD han omadus las medemas valurs, ha ditg Stefan Schena, il directur da la cassa da malsauens. Cuntent d'avair chattà cun la ÖKK in ulteriur partenari e sponsor grischun è er Marc Gianola, il directur dal Club da hockey Tavau. Cun la Calanda, la Banca chantunala e la Burkhalter Group haja il HCD gia trais buns partenaris e sponsurs dal Grischun. Bel fiss sche quella gruppa vegniss anc pli gronda per exempel cun la Ems Chemia, ubain la Hamilton, ha punctuà Gianola.

Da buna speranza

Gianola, l'antierur defensur ed oz directur dal HCD, ha ditg d'esser da buna speranza che ses club cuntanschia la runda dals playoffs a la fin da la prerunda dal campinadi da hockey 2019/20. Quai saja bunamain in'obligaziun, ha accentuà l'Engiadinais ch'è stà blers onn ina ferma pitga dal HCD. Il team saja ussa puspè in'unitad suenter la stagiun turbulenta 2018/19. Per Gianola tutgan Berna, Zug ed il ZSC tar ils gronds favorits. Cun Leonardo Genoni haja Zug bain il meglier goli en sia retscha. Tar il team da surpraisa tutga Losanna ch'haja intgins novs giu-



Stefan Schena (a san.), il schef da la ÖKK, e Marc Gianola, il directur dal HCD.

gadors. Lugano e Friburg na tutgan betg tar ils favorits, ha menziunà Gianola. Clubs da vischnanca sajan anc adina Ambri, Langnau e Tavau.

Ambri a la Cuppa Spengler

Gia ussa sa legra el sin l'ambianza durant la Cuppa Spengler, cun la participaziun dal club ticinai Ambri. Ils fans da quel club sajan genials, quai che saja lura er il cas tar ils fans dal HCD. Quai che pertutga in giugadur che remplazza Magnus Nygren, el ch'è sa blessà avant curt, saja il club bain a la tshertga d'in auter giugadur, dentant saja quai in pau pli difficil, ha punctuà Gianola.

In ferm team enturn il nov trenader

Da nov a la banda tar il HCD vegn a star Christian Wohlwend, el ch'è entusiasma da ses team. Ils fans dal Club da hockey Tavau vegnian a vesair in'equipa plain temperament, cun ina gronda voluntad,

ambiziosa e che veglia bler dapli che be la qualificaziun per la runda dals playoffs. Tuttina punctuescha Wohlwend: «Jau n'empermet nagin titel.» Defensiv haja il team fatg in grond progress ed er offensiv paria el d'esser pli effizient, ha menziunà il nov trenader dal HCD. L'identitad dal club, quella resta vinavant, saja il HCD anc adina il club da las muntognas, ha manegià Wohlwend. Manar enavos il team da Tavau tar il success vules il trenader principal er cun sustegn da sia equipa sco ils dus assistents Johan Lundskog e Walteri Immonen, il trenader dals golis Peter Mettler, il coach d'atletica Steven Lingenbagg ed il coach da videos Patrice Arnold. Vitiers vegn lura anc il schef da sport Raeto Raffainer, el che conuscha fitg bain il hockey svizzer. Mintgina da quellas persunas dal stab haja clers pensums e possia er lavurar individual, animar il team e barattar ideas, ha ditg il schef-coach Wohlwend.



Il schef-coach dal club Christian Wohlwend.



Els dus èn vegnids d'Ambri tar il HCD: Samuel Guerra (a san.) e Lorenz Kienzle.



Dus giugadors da l'exteriur: Aaron Palushaj e Mattias Tedenby (da san.).



Andres Ambühl, ina da las fermas pitgas.



Gia dapi onns fidaivel al club: Dino Wieser.



In defensur e dus attagaders: Lukas Stoop, Chris Egli ed Enzo Corvi (da san.).



Pronts per la nova stagiun da hockey: Tino Kessler e Joren Van Pottelberghe (da san.).